

老子道经

体道第一（唐以前本无此章名）

道可道。一一谓经术政教之道也。

非常道。一一非自然长生之道也。常道当以无为养神，无事安民，含光藏晖，灭迹匿端，不可称道。1，刘本当以作常以。

名可名。一一谓富贵尊荣高世之名也。1，刘本高世作万世。

非常名。一一非自然常在之名也。常名当如婴儿之未言鸡子之未分，明珠在蚌中，美玉处石闲，内虽昭昭，外如愚顽。

无名天地之始。一一无名者谓道，道无形，故不可名也。始者道本也，吐气布化，出于虚无，为天地本始也。1，道藏本道本作道之本。顾本，强本无[本也]二字。

有名万物之母。一一有名谓天地，天地有形位，有阴阳有柔刚，是其有名也。万物母者天地含气生万物，长大成熟，如母之养子也。1，有阴阳的有字，据顾本补。2，道藏其有名作其名。3，强本天地含气作天地合气。4，道藏成熟作成就。

故常无欲以观其妙。一一妙，要也。人常能无欲，则可以观道之要，要谓一也。一出布名道，赞叙明是非也。1，道藏作[则以观道之要妙]。

常有欲以观其徼。一一徼，归也。常有欲之人，可以观世俗之所归趣也。

此两者同出而异名。一一两者，谓有欲无欲也。同出者，同出人心也。而异名者，所名各异也。名无欲者长存，名有欲者亡身也。1，同出人心，道藏作[谓同于人心]，顾本作[同出人之中心也]。2，所名各异，道藏作所名曰异。3，名无欲，名有欲，顾本作无欲，有欲。4，强本此段作[有欲无欲，同出人心。无欲长存，有欲亡身，故异也。]

同谓之玄。一一玄，天也。言有欲之人与无欲之人同受气于天也。

玄之又玄。一一天中复有天也。禀气有厚薄，得中和滋液则生贤圣，得错乱污辱则生贪淫也。1，污辱，道藏本作浊辱，顾本作浊厚。

众妙之门。一一能知天中复有天，禀气有厚薄，除情去欲，守中和，是谓知道要之门户也。1，除情去欲，道藏无去字。2，是谓一句，道藏本作[是谓知道要妙之门也]，顾本作[是谓知道之门也。]

养身第二

天下皆知美之为美。一一自扬己美，使显彰也。1，集注本使作便。

斯恶已。一一有危亡也。1，集注本作[有粗玉也]。

皆知善之为美。一一有功名也。

斯不善已。一一人所争也。

故有无相生。一一见有而为无也。

难易相成。一一见难而为易也。

长短相形。一一见短而为长也。1，道藏本作见短之相形也。

高下相倾、一一见高而为下也。

音声相和。一一上唱下必和也。

前后相随。一一上行下必随之也。1，刘本随作倾。

是以圣人处无为之事。一一以道治也。

行不言之教。一一以身率导之也。

万物作焉而不辞。一一各自动作，不辞谢而逆止。1，影宋本原作动也。
道藏本作动作。

生而不有。一一元气生万物而不有。1，意林和强本此句作元气万物而不有也。

为而不恃。一一道所施为，不恃望其报也。强本作不恃其报，道藏本作不望其报，意林作不求其报。

功成而弗居。一一功成事就，退避不居其位。1，弗居，道藏作不居。

夫惟不居。一一夫惟功成不居其位。

是以不去。一一福德常在，不去其身也。此言不行不可随，不言不可知矣。上六句有高下长短，君开一源，下生百端，百端之变，无不动乱。1，矣，只有刘本作矣，影宋本等作疾。2，君，道藏本作若。

安民第三

不尚贤。一一贤谓世俗之贤，辩口明文，离道行权，去质为文也。不尚者，不贵之以禄，不尊之以官也。

使民不争。一一不争功名，返自然也。

不贵难得之货。一一言人君不御好珍宝，黄金弃于山，珠玉捐于渊也。

使民不为盗。一一上化清静，下无贪人。

不见可欲。一一放郑声，远佞人。

使心不乱。一一不邪淫，不惑乱也。

是以圣人之治，一一说圣人治国与治身也。

虚其心，一一除嗜欲，去烦乱也。

实其腹，一一怀道抱一，守五神也。

弱其志，一一和柔谦虚，不处权也。

强其骨，一一爱精重施，髓满骨坚。

常使民无知无欲，一一反朴守淳。

使夫智者不敢为也。一一思虑深，不轻言。

为无为，一一不造作，动因循。

则无不治。一一德化厚，百姓安。

无源第四

道冲而用之。一一冲，中也。道匿名藏誉，其用在中。

或不盈。一一或，常也。道常谦虚，不盈满。

渊乎似万物之宗。一一道渊深不可知也、似为万物之宗祖。

挫其锐。一一锐、进也。人欲锐精进取功名、当挫上之法道不自也。

解其纷。一一纷、结根也。当念道无为以解释。

和其光。一一言虽有独见之明、当知闇昧、不当以擢乱人也。

同其尘。一一常与众庶同垢尘不当自别殊。

湛兮似若存。一一言当湛然安静故能长存不亡。

吾不知谁之子。一一老子言我不知道所从生。

象帝之先。一一道自在天帝之前，此言道乃先天地生也。至今在者以能安静湛然不劳烦欲使人修身法道。

虚用第五

天地不仁。一一天施地化，不以仁恩任自然也。

以万物为刍狗。一一天地生万物人最为贵天地视之如刍草狗畜不责望其报也。

圣人不仁。一一圣人爱养万民不以仁恩法天地行自然。

以百姓为刍狗。一一圣人视百姓如刍草狗畜，不责望其礼意。

天地之间。一一天地之间空虚和气流布，故万物自生人能除情欲节滋味，清五藏，则神明居之也。

其犹橐钥乎。一一橐钥中空虚，人能有声气。

虚而不屈，动而愈出。一一言空虚无有屈竭时动摇之益出声气也。

多言数穷。一一多事害神多言害身，口开舌举，必有祸患。

不如守中。一一不如守德于中育养精神爱气希言。

成象第六

谷神不死。一一谷养也。人能养神则不死也。神谓五藏之神也。肝藏魂，肺藏魄，心藏神，肾藏精，脾藏志，五藏尽伤则五神去矣。

是谓玄牝。一一言不死之有在于玄牝。玄，天也。于人为鼻，入藏于心，五气清微，为精神聪明，音声五性其鬼曰魂。魂者雄也，主出入人鼻，与天通，故鼻为玄也。地食人以五味，从口入，藏于胃，五性浊辱，为形骸骨肉，血脉六情其鬼曰魄，魄者雌也，主出入于口与天地通，故口为牝也。

玄牝之门，是谓天地根。一一根元也。言鼻口之门是乃通天地之元气所从

往来。

绵绵若存。一一鼻口呼翕（加口旁在左）喘息当绵绵微妙若可存复若无有。

用之不勤。一一用气常宽舒不当急疾勤（下加心）劳也。

韬光第七

天长地久。一一说天地长生久寿以谕（改言为口）教人也。

天地所以能长且久者，以其不自生。一一天地所以独长且久者，以其安静施不荣报不如人居处汲汲求自饶之利夺人以自与。

故能长生。一一以其不求生故能长生不终也。

是以圣人后其身。一一先人而后己者也。

而身先。一一天下敬之先以为长。

外其身。一一薄己而厚人也。

而身存。一一百姓爱之如父母神明佑（改示旁）之若赤子，故身常存。

非以其无私邪。一一圣人为人所爱神明所佑（改示旁）非以其公正无私所致乎。

故能成其私。一一人以为私者欲以厚己也，圣人无私而已自厚，故能成其私也。

易性第八

上善若水。一一上善之人，如水之性。

水善利万物。一一水在天为雾露，在地为泉源也。

而不争，处众人之所恶。一一众人恶卑湿垢浊，水独静流居之也。

故几于道。一一水性几于与道同。

居善地。一一水性善喜于地草木之上即流而下有似于牝动而下人也。

心善渊。一一水深空虚，渊深清明。

与善仁。一一万物得水以生与虚不与盈也。

言善信。一一水内影照形不失其情也。

正善治。一一无有不洗，清且平也。

事善能。一一能方能圆，曲直随形。

动善时。一一夏散冬凝应期而动不失天时。

夫唯不争。一一壅之则止，决之则流，听从人也。

故无尤。一一水性如是，故天下无有怨尤水者也。

运夷第九

持而盈之，不如其已。一一盈，满也。已，止也。持满必倾，不如止也。

揣而锐之，不可长保。一一揣，治也。先揣之后必弃捐。

金玉满堂，莫之能守。一一嗜欲伤神，财多累身。

富贵而骄自遗其咎。一一大富当赈贫贵当怜贱而反骄恣必被祸患也。

功成名遂身退天之道。一一言人所为功成事立名迹称遂不退身避位则遇于害，此乃天之常道也。譬如日中则移，月满则亏物盛则衰乐极则哀。

能为第十

载营魄。一一营魄，魂魄也。人载魂魄之上，得以生当爱养之，喜怒亡魂座惊伤魄魄在肝魄在肺，美酒甘肴腐人韦（左加月）肺，故魂静志道不乱，魄安得寿延年也。

抱一能无离。一一言人能抱一使不离于身则长存一者道始所生大和之精气也。故曰一布名于天下天得一以清，地得一以宁，侯王得一以为正平。入为心，出为行，布施为德，总名为一。一之为言志一无二也。

专气致柔。一一专守精气使不乱则形体能应之而柔顺。

能婴儿。一一能如婴儿内无思虑外无政事，则精神不去也。

涤除玄览。一一当洗其心使洁净也。心居玄冥之处，览知万事，故谓之玄览也。

能无疵。一一不淫邪也。净能无疵病乎。

爱民治国。一一治身者爱气，则身全。治国者爱民则国安。

能无知。一一治身者呼吸精气无令耳闻也。治国者布施惠德无令下知也。

天门开阖。一一天门谓北极紫微宫。开阖谓终始五际也。治身天门谓鼻孔，开谓喘息，阖谓呼吸也。

能无雌。一一治身当如雌牝安静柔弱治国应变和而不唱。

明白四达。一一言达明白如日月四通满于天下八极之外，故曰视之不见听之不闻，彰布之于十方灿灿煌煌也。

能无知。一一无有能知道满于天下者。

生之畜之。一一道生万物而畜养之。

生而不有。一一道生万物无所取有。

为而不恃。一一道所施为不恃望其报也。

长而不宰。一一道长养万物不宰割以为器用。

是谓玄德。一一言道行德玄冥不可得见欲使人如道也。

无用第十一

三十辐共一毂。一一古者车三十辐法月数也。共一毂者，毂中有孔故众辐共凑之。治身者当除情去欲使五藏空虚神乃归之也。治国者寡能总众弱共使强。

当其无有车之用。一一无谓空虚。毂中空虚车得去行辘中空虚人能载其上。

也。

埴埴以为器。——器中空虚故得有所盛受。

凿户牖以为室。——谓作屋室。

当其无有室之用。——言户牖空虚人得以出入观视室中空虚人得以居处是其用。

故有之以为利。——利物也利于形用器中有物室中有人恐其屋破壊腹中有神畏形之消亡也。

无之以为用。——言虚空者乃可用盛受万物，故曰虚无能制有形，道者空也。

检欲第十二

五色令人目盲。——贪淫好色则伤精失明也。

五音令人耳聋。——好聽五音则和氣去心不能聽无声之声。

五味令人口爽。——爽、失也。人嗜五味于口则口亡言失于道味也。

驰骋田猎令人心发狂。——人精神好安静驰骋呼吸精神散亡故发狂也。

难得之货令人行妨。——妨，伤也。难得之货谓金银珠玉心贪意欲不知厌足则行伤身辱也。

是以圣人为腹。——守五性去六情，节志气养神明。

不为目。——目不妄视，妄视泄精于外。

故去彼取此。——去彼目之妄视，取此腹之养性。

厌耻第十三

宠辱若惊。——身宠亦惊，身辱亦惊。

贵大患若身。——贵，畏也。若，至也。畏大患至身也。故皆惊。

何谓宠辱。——问何为宠何为辱。宠者尊荣辱者耻辱及身还自问者以晓人也。

辱为下。——辱为下贱。

得之若惊。——得宠荣惊者，处高位如临深危也。贵不敢骄，富不敢奢。

失之若惊。——失者失宠处辱也。惊者恐祸重来也。

是谓宠辱若惊。——解上得之若惊失之若惊。

何谓贵大患若身。——复还自问何故畏人若身。

吾所以有大患者，为吾有身。——吾所以有大患者为吾有身，有身忧其勤劳，念其饥寒触情從欲则遇祸患也。

及吾无身吾有何患。——使吾无有身体得道自然轻举升云出入无间与道通神当有何患。

故贵以身为天下者，则可寄于天下。——言人君贵其身而贱人欲为天下主

者则可寄立不可以久也。

爱以身为天下者，乃可以托于天下。——言人君能爱其身非为己也乃欲为万民之父母以此得为天下主者乃可以托其身于万民之上长无咎也。

赞玄第十四

视之不见名曰夷。——无色曰夷。言一无采色不可得视而见之。

听之不闻名曰希。——无声曰希。言一无音声不可得听而闻之。

抟之不得名曰微。——无形曰微，言一无形体不可抟持而得之。

此三者不可致诘。——三者谓夷希微也。不可致诘者，夫无色无声无形口不能言书不能传当受之以静求之以神不可诘问而得之也。

故混而为一。——混合也。故合于三名之而为一。

其上不皦。——言一在天下不皦光明。

其下不昧。——言一天下不昧昧有所闇冥。

绳绳不可名。——绳绳者，动行无穷极也。不可名者，非一色也。不可以青黄白黑别非一声也，不可以宫商角征羽听，非一形也，不可以长短大小度之也。

复归于无物。——物，质也。复当归之于无质。

是谓无状之状。——言一无形状而能为万物作形状也。

无物之象。——一无物质而为万物设形象也。

是为惚恍。——一忽忽恍恍者若存若亡不可见之也。

迎之不见其首。——一无端末不可预待也。除情去欲，一自归之也。

随之不见其后。——言一无影迹不可得而看。

执古之道，以御今之有。——圣人守古道生一以御物，知今当有一也。

以知古始是谓道纪。——人能知上古本始有一是谓知道纲纪也。

显德第十五

古之善为士者。——谓得道之群也。

微妙玄通。——玄，天也，言其志节玄妙精与天通也。

深不可识。——道德深远不可识知内视若盲反听若聋莫知所长。

夫唯不可识故强为之容。——谓下句也。

与兮若冬涉川。——举事辄加重慎与与兮若冬涉川，心犹难之也。

犹兮若畏四邻。——其进退犹犹如拘制若人犯法畏四邻知之也。

俨兮其若客。——如客畏主人俨然无所造作也。

涣兮若冰之将释。——涣者解散，释者消亡，除情去欲，日以空虚。

敦兮其若朴。——孰者质厚，朴者形未分，内守精神，外无文采也。

旷兮其若谷。——旷者宽大，谷者空虚，不有德功名无所不包也。

浑兮其若浊。一一浑者守举真浊者不照然也。与众合同不自尊。

孰能浊以静之徐清。一一孰谁也。谁能知水之浊止而净之，徐徐自清也。

孰能安以久动之徐生。一一谁能安静以久徐徐以长生也。

保此道者不欲盈。一一保此徐生之道不欲奢泰盈溢。

夫唯不盈，故能蔽不新成。一一夫唯不盈满之人能守蔽不为新成蔽者匿光荣也。新成者贵功名。

归根第十六

至虚极。一一得道之人捐情去欲，五内清静，至于虚极。

守静笃。一一守清静，行笃厚。

万物并作。一一作，生也。万物相生也。

吾以观其复。一一言吾以观见万物无不皆归其本也。人当念重本也。

夫物芸芸。一一芸芸者，华叶盛。

各复归其根。一一言万物无不枯落各复反其根而更生也。

归根曰静。一一静谓根也。根安静柔弱谦卑处下，故不复死也。

是谓复命。一一言安静者是为复还性命使不死也。

复命曰常。一一复命使不死，乃道之所常行也。

知常曰明。一一能知道之所常行，则为明。

不知常，妄作凶。一一不知道之所常行妄作巧诈则失神明故凶也。

知常容。一一能知道之所常行去情忘欲无所不包容也。

容乃公。一一无所不包容则公正无私众邪莫当。

公乃王。一一公正无私可以为天下王治身正则形一神明千万共凑己躬也。

王乃天。一一能王德合神明乃与天子。

天乃道。一一德与天通则与道合同也。

道乃久。一一与道合同乃能长久。

没身不殆。一一能公能天通天合道四者纯备道德弘远无殃无咎乃与天地俱没不危殆也。

淳风第十七

太上下知有之。一一太上谓太古无名之君也。下知有之者下知上有君而不臣事质朴也。

其次亲之誉之。一一其德可见恩惠可称，故亲爱而誉之。

其次畏之。一一设刑法以治之。

其次侮之。一一禁多令烦不可归诚故欺侮之。

信不足焉。一一君信不足于下，下则应之以不信而欺其君也。

犹兮其贵言。一一说太上之君举事犹贵重于言恐离道失自然。

功成事遂。一一谓天下太平也。

百姓皆谓我自然。一一百姓不知君上之德淳厚，反以为只自当然也。

俗薄第十八

大道废，有仁义。一一大道之时家有孝子，户有忠信仁义不见也。大道废不用恶逆生乃有仁义可传道也。

知惠出有大伪。一一智惠之君贱德而贵言贱质而贵文下则应之以为大伪奸诈。

六亲不和有孝慈。一一六絶絶亲戚不和乃有孝慈相牧养也。

国家昏乱有忠臣。一一政令不行，上下相怨，邪僻争权，乃有忠臣匡正其君也。此言天下太平，不知仁人，尽无欲，不知廉，各洁己，不知贞。大道之君，仁义没，孝慈灭，犹日中盛时众星失光。

还淳第十九

絶圣。一一絶圣制作反初守元五帝垂象苍颉作书不如三皇结绳无文。

弃智。一一弃智惠反无为。

民利百倍。一一农事修公无私。

絶仁弃义。一一絶仁之见恩惠，弃义之尚华信。

民复孝慈。一一德化淳也。

絶巧弃利。一一絶巧者诈伪乱真也。弃利者，塞贪路闭权门也。

盗贼无有。一一上化公政下无邪私。

此三者。一一谓上三事所弃絶也。

以为文不足。一一以为文不足者，文不足以教民。

故令有所属。一一当如下句。

见素抱朴。一一见素者当抱素守真，不尚文饰也。抱朴者当见其笃朴以示下，故可法则。

少私寡欲。一一少私者正无私也。寡欲者当知足也。

异俗第二十

絶学。一一絶学不真不合道文。

无忧。一一除浮华则无忧患也。

唯之与阿，相去几何。一一同为应对而相去几何疾时贱质而贵文。

善之与恶，相去何若。一一善者和誉，恶者谏争，能相去何如，疾时恶忠直用邪佞也。

人之所畏，不可不畏。一一人谓道人也。人所畏者畏不絶学之君也。不可不畏，近令色，杀仁贤。

荒兮其未央哉。一一或言世俗人荒乱欲进学为文未央止也。

众人熙熙。一一熙熙，淫放多情欲也。
如享太牢。一一如饥思太牢之具意无足时也。
如春登台。一一春阴阳交通万物感动登台观之意志淫淫然。
我独怕兮其未兆。一一我独怕然安静未有情欲之形兆也。
如婴儿之未孩。一一如小儿未能答偶人时也。
乘乘兮若无所归。一一我乘乘如穷鄙无所归就。
众人皆有余。一一众人余财以为奢余智以为诈。
而我独若遗。一一我独如遗弃似于不足也。
我愚人之心也哉。一一不与俗人相随守一不移如愚人之心也。
沌沌兮。一一无所分别。
俗人昭昭。一一明且达也。
我独若昏。一一如闇昧也。
俗人察察。一一察察急且疾也。
我独闷闷。一一闷闷无所割截。
忽兮若海。一一我独忽忽如江海之流，莫知其所穷极也。
漂兮若无所止。一一我独漂漂若飞若扬无所止也。志意在神域也。
众人皆有以。一一以有为也。
而我独顽。一一我独无为也。
似鄙。一一鄙似若不逮也。
我独异于人。一一我独与人异也。
而贵食母。一一食，用也。母，道也。我独贵用道也。
虚心第二十一
孔德之容。一一孔，大也。有大德之人，无所不容能受垢浊处谦卑也。
唯道是从。一一唯，独也。大德之人不随世俗所行独从于道也。
道之为物唯恍唯忽。一一道之于万物独恍忽往来于其无所定也。
忽兮恍兮其中有像。一一道唯忽恍无形之中独为万物法像。
恍兮忽兮，其中有物。一一道唯恍忽其中有一经营主化因气立质。
窈兮冥兮其中有精。一一道唯窈冥无形其中有精实神明相薄阴阳交会也。
其精甚真。一一言存精气其妙甚真非有饰也。
其中有信。一一道匿功藏名其信在中也。
自古及今，其名不去。一一自，从也。自古至今，道常在不去。
以阅众甫。一一阅，禀也。甫，始也。言道禀与万物始生从道受气。
吾何以知众甫之然哉。一一我何以知从道受气。
以此。一一此，今也。以今万物皆得道精气而生动作起居非道不然。

益谦第二十二

曲则全。——一曲己从众不自专则全其身也。

枉则直。——枉屈己而申人久久自得直也。

洼则盈。——地洼下水流之人则下德归之也。

弊则新。——自受弊薄后己先人天下敬之久久自新也。

少则得。——自受取少则得多也。天道佑谦神明托虚。

多则惑。——财多者惑于所守，学多者惑于所闻。

是以圣人抱一为天下式。——抱守法式也。圣人守一乃知万事故能为式也。

。

不自见故明。——圣人以其目视千里之外也。乃因天下之目以视故能明达也。

不自是故彰。——圣人不自以为是而非人故能彰显于世。

不自伐故有功。——伐，取也。圣人德化流行不自取其美，故有功于天下。

。

不自矜故长。——矜，大也。圣人不自贵大，故能久不危。

夫唯不争，故天下莫能与之争。——此言天下贤与不肖无能与不争者争也。

。

古之所谓曲则全者，岂虚言哉。——传古言曲从则全身正言非虚妄也。

诚全而归之。——诚，实也。能行曲从者实其饥体归之于父母，无有伤害也。

虚无第二十三

希言自然。——希言者是爱言也。爱言者自然之道。

飘风不终朝，骤雨不终日。——飘风疾风也。骤雨暴雨也。言疾不能长，暴不能久也。

孰为此者，天地。——谁为此飘风暴雨者乎，天地所为。

天地尚不能久。——不终于朝暮也。

而况于人乎。——天地至神合为飘风暴雨尚不能使终朝至暮何况人欲为暴卒乎。

故从事于道者。——从为也。人为事当如道安静不当如飘风骤雨。

道者同于道。——道者谓好道人也同于道者所谓与道同。

德者同于德。——德谓好德人也。同于德者所谓与德同也。

失者同于失。——失谓任己失人也。同于失者所谓与失同也。

同于道者道亦乐得之。——与道同者道亦乐得之也。

同于德者德亦乐得之。——与德同者德亦乐得之也。

同于失者失亦乐失之。一一与失同者失亦乐失之也。

信不足焉。一一君信不足于下，下则应君以不足也。

有不信焉。一一此言物类相归同声相应云从龙，风从虎，水流湿，火就燥，自然之类也。

苦恩第二十四

跂者不立。一一跂，进也。谓贪权慕名进取功荣也。则不可久立身行道也。

跨者不行。一一自以为贵而跨于人众共蔽之使不得行。

自见者不明。一一人自见其形容以为好自见所行以为应道殊不知其形丑操行之鄙。

自是者不彰。一一自以为是而非人众共蔽之使不得彰明。

自伐者无功。一一所谓辄自伐取其功美即失有功于人也。

自矜者不长。一一好自矜大者不可以长久。

其于道也曰余食赘行。一一赘，贪也。使此自矜伐之人在治国之道曰然敛余禄食为贪行赘。

物或恶之。一一此人在位动欲伤害故物无有不畏恶地。

故有道者不处也。一一言有道之人不居其国也。

象元第二十五

有物混成，先天地生。一一谓道无形混沌而成万物乃在天地之前。

寂兮寥兮，独立而不改。一一寂者无音声，寥者空无形。独立者无匹双。不改者化有常。

周行而不殆。一一道通行天地无所不入在阳不焦托阴不腐，无不贯穿不危殆。

可以为天下母。一一道育养万物物精气如母之养子。

吾不知其名字之曰道。一一我不见道形容不知当何以名之见万物皆从道所生故字之曰道也。

强为之名曰大。一一不知其名强曰大者高而无上，罗而无外，无不包容，故曰大也。

大曰逝。一一其为大非若天常在上，非若地常在下，乃复逝去无常处所也。

逝曰远。一一言远者穷乎无穷，布气天地无所不通也。

远曰反。一一言其远不越绝乃复在人身也。

故道大天大地大王亦大。一一道大者包罗诸天地无所不容也。天大者无所不盖也。地大者无所不载也。王大者无所不制也。

域中有四大。一一四大，道天地王也。凡有称有名，则非其极也。言道则有所由，有所由然后谓之为道，然则是道称中之大也。不若无称之大也。无称不可得而名曰域也。天地王皆在乎无称之内也。故曰域中有四大者也。

而王居其一焉。一一八极之内有四大王居其一也。居一作处。

人法地。一一人当法地安静柔和也。种之得五谷掘之得甘泉劳而不怨也。有功而不制也。

地法天。一一天湛泊不动施而不求报生长万物无所收取。

天法道。一一道清静不言阴行精气万物自成也。

道法自然。一一道性自然，无所法也。

重德第二十六

重为轻根。一一人君不重则不尊治身不重则失神草木之华轻故零落，根重故长存也。

静为躁君。一一人君不静则失威，治身不静则身危。龙静故能变化，虎躁故夭亏也。

是以圣人终日行不离辘重。一一辘，静也。圣人终日行道不离其静与重也。

虽有荣观燕处超然。一一荣观谓宫卦(上加门)，燕处后妃所居也。超然远避而不处也。

奈何万乘之主。一一奈何者，疾时主伤痛之辞。万乘之主谓王。

而以身轻天下。一一王者至尊而以其身行轻躁乎。疾时王奢恣轻淫也。

轻则失臣。一一王者轻滔则失其臣，治身轻淫则失其精。

躁则失君。一一王者行躁疾则失其君位，治身躁疾则失其精神也。

巧用第二十七

善行无辙迹。一一善行道者求之于身不下堂不出门故无辙迹。

善言无瑕谪。一一善言谓择言而出则无瑕疵谪过于天下。

善计不用筹策。一一善以道计事者则守一不移所计不多则不用筹策而可知也。

善闭无关键而不可开。一一善以道闭情欲守精神者不如门户有关键可得开。

善结无绳约而不可解。一一善以道结事者乃可结其心不如绳索可得解也。

是以圣人常善救人。一一圣人所以常教人忠孝者欲以救人在命。

故无弃人。一一使贵贱各得其所也。

常善救物。一一圣人所以教民顺四时以救万物之残伤。

故无弃物。一一圣人不贱石而贵玉，视之如一。

是谓袭明。——圣人善救人物谓袭明大道也。

故善人者不善人之师。——人之行善者圣人即以为人师。

不善人者善人之资。——资，用也。人行不善，圣人犹教导使为善得以给用也。

不贵其师。——独无辅也。

不爱其资。——无所使也。

虽智大迷。——虽自以为智，言此人乃大迷惑。

是谓要妙。——能通此意，是谓知微妙要道也。

反朴第二十八

知其雄，守其雌，为天下溪。——雄以谕尊雌以谕卑人虽知自尊显当复守之以卑微去之强梁就雌之柔和如是则天下归去如水流入深溪也。

为天下溪、常德不离。——人能谦下如深溪则德常在不复离于己。

复归于婴儿。——常复归志于婴儿蠢然而无所知也。

知其白守其黑为天下式。——白以谕昭昭，黑以谕默默。人虽自知昭昭明白当复守之以默默如闇昧无所见如是则可为天下法式，则得常在。

为天下式，常德不忒——人能天下法则德常在于己不复差忒。

复归于无极。——德不差忒、则长生久寿归身于无穷极也。

知其荣守其辱为天下谷——荣以谕尊贵辱以谕污浊知己之有荣贵当守之以污浊如是则天下归之如水流入深谷也。

为天下谷，常德乃足。——足，止也。人能为天下谷德乃止于己。

复归于朴。——复当归身于质朴不复为文饰。

朴散则为器。——万物之朴散则为器用也。若道散则为神明流为日月分为五行也。

圣人用之则为官长。——圣人升用则为百官之元长也。

故大制不割。——圣人用之则以大道制御天下无所伤割。治身则以天道制情欲不害精神也。

无为第二十九

将欲取天下。——欲为天下主也。

而为之。——欲以有为治民。

吾见其不得已。——我见其不得天道人心已明矣。天道恶烦浊人心恶多欲。

天下神器不可为也。——器，物也。人乃天下之神物也。神物好安静不可以有为治。

为者败之。——以有为治之则败其质性。

执者失之。----强执教之人则失其情实生于诈伪也。

故物或行或随。----上所行下必随之也。

或响或吹。-----响，温也。吹，寒也。有所温必有所寒也。

或强或羸。----有所强大必有所羸弱也。

或载或隳。----载，安也。隳，危也。有所安必有所危。明人君不可以有为治国与治身也。

是以圣人去甚去奢去泰。----甚谓贪淫声色奢谓服饰饮食泰谓宫室台榭去此三者处中和行无为则天下自化。

俭武第三十

以道佐人主者。----谓人主能以道自辅佐也。

不以兵强天下。----以道自佐之主不以兵革顺天任德敌人自服。

其事好还。----其举事好还自责不怨于人也。

师之所处，荆棘生焉。----农事废田不修。

大军之后必有凶年。----天应之以恶气即害五穀五穀尽伤人也。

善者果而已。----善兵者当果敢而已不休。

不敢以取强。----不以果敢取强大之名也。

果而勿矜。----当果敢谦卑勿自矜大也。

果而勿伐。----当果敢推讓乃自伐取其美也。

果而勿骄。----骄，欺也。果敢勿以骄欺人。

果而不得已。----当果敢至诚不当迫不得已也。

果而勿强。----果敢勿以为强兵坚甲以欺凌人也。

物壮则老。----草木壮极则枯落人壮极则衰老也。言强者不可以壮。

是谓不道。----枯老者坐不行道也。

不道早已。----不行道者早死。

偃武第三十一

夫佳兵者不祥之器。----祥，善也。兵者惊精神浊和气、不善人之器也。不当修饰之。

物或恶之。----兵动则有所害故万物无有不恶之。

故有道者不处。----有道之人不处其国。

君子居则贵左。----贵柔弱也。

用兵则贵右。----贵刚强也。此言兵道与君子道反所贵者异也。

兵者不祥之器。一一兵革者不善之器也。

非君子之器也。一一非君子所贵重器也。

不得已而用之。一一谓遭衰逆乱祸欲加万民乃用之以自守。

恬惓为上。——不贪土地利人财宝。惓一本作然。

胜而不美。——虽得胜而不以为利己也。

而美之者是乐杀人。——美得胜者是为喜乐杀人者也。

夫乐杀人者则不可以得志于天下矣。——为人君而乐杀人此不可使得志于天下为人主心专制人命妄行刑诛。

吉事尚左。——左生位也。

凶事尚右。——阴道杀人。

偏将军居左。——偏将军卑而居阳者以其不专杀也。

上将军居右。——上将军尊而居右者言其主杀也。

言以丧礼处之。——上将军于右丧礼尚右死人贵阴也。

杀人之众以悲哀泣之。——伤己德薄不能以道化人而害无辜之民。

战胜以丧礼处之。——古者战胜将军居丧主礼之位。素服而哭之，明君子贵德而贱兵不得已诛不祥心不乐之，比于丧也。知后世用兵不已，故悲痛之。

圣德第三十二

道常无名。——道能阴能阳能施能张能存能亡故无常名也。

朴虽小天下不敢臣。——道朴虽小微妙无形天下不敢有臣使道者也。

侯王若能守之万物将自宾。——侯王若能守道无为万物将自宾服从于德也。

天地相合以降甘露。——侯王动作能与天相应合天即下甘露善瑞也。

民莫之令而自均。——天降善瑞则万物莫有教令之者皆自均调若一也。

始制有名。——始，道也。有名万物也。道无名能制于有名，无形能制于有形也。

名亦既有。——既，尽也。有名之物尽有情欲叛道离德，故身毁辱也。

天亦将知之。——人能去道行德天亦将自知之。

知之所以不殆。——天知之则神灵佑助不复危殆。

譬道之在天下，犹川谷之与江海。——言言道之在天下与人相应和如川谷与江海相流通也。

辩德第三十三

知人者智。——能知人好恶是为智。

自知者明。——人能自知贤肖是为反听无声内视无形，故为明。

胜人者有力。——能胜人者不过以威力也。

自胜者强。——人能自胜己情欲则天下无有能与己争者，故为强。

知足者富。——人能知足之为足则长保福禄故为富也。

强行者有志。——人能强力行善则为有意于道道亦有意于人。

不失其所者久。——人能自节养不失其所受天之精气则可以久。

死而不亡者寿。——目不妄视，耳不妄听，口不妄言，则无怨恶于天下，故长寿。

任成第三十四

大道汜兮。——言道汜汜若浮若沈若有若无视之不见，说之难殊。

其可左右。——道可左右无所不宜。

万物恃之而生。——恃，待也。万物皆恃道而生。

而不辞。——道不辞谢而逆止也。

功成不名有。——有道不名其有功也。

爱养万物而不为主。——道虽爱养万物不如人主有所放取。

常无欲可名于小。——道匿德藏名恒然无为似若微小也。

万物归焉而不为主。——万物皆归道受气道非如人主有所禁止也。

可名为大。——万物横来横去使名自在故不若于大也。

是以圣人终不为大。——圣人法道匿德藏名，不为满大。

故能成其大。——圣人以身师导不言而化万事修治故能成其大。

仁德第三十五

执大象，天下往。——执，守也。象，道也。圣人守大道则天下万民移心归往之也。治身则天降神明往来于己也。

往而不害安平太。——万物归往而不伤害则国安家宁而致太平矣。治身不害神明则身安而大寿也。

乐与饵，过客止。——饵，美也。过客一也。人能乐美于道则一留止也。一者去盈而处虚忽忽如过客。

道之出口，淡乎其无味。——道出入于口淡淡非如五味有酸咸苦甘辛也。

视之不足见。——足，德也。道无形非若五色有青黄赤白黑可得见也。

听之不足闻。——道非若五音有宫商角征羽可得听闻也。

用之不可既。——用道治国则国安民昌，治身则寿命延长，无有既尽时也。

微明第三十六

将欲翕（加口旁）必固张之。——先开张之者欲极其奢淫。

将使弱之，必固强之。——先强大之者欲使遇祸患。

将欲废之，必固兴之。——先兴之者欲使其骄危也。

将欲夺之，必固与之。——先与之者欲极其贪心也。

是谓微明。——此四事其道微其效明也。

柔弱胜刚强。——柔弱者久长刚强者先亡也。

鱼不可脱于渊。——鱼脱于渊为去刚得柔不可复制也。

国之利器不可以示人。——利器权道也。治国权者不可以示执事之臣也。
治身道者不可以示非其人也。

为政第三十七

道常无为。——道以无为为常也。

而无不为侯王若能守万物将自化。——言侯王若能守道万物将自化效于己也。

化而欲作吾将镇之以无名之朴。——吾，身也。无名之朴道也。万物以化效于己也。复欲作巧伪者侯王当身镇抚以道德。

无名之朴亦将不欲不欲以静。——言侯王镇抚以道德民亦将不欲改当以清静导化之也。

天下将自定。——能如是者天下将自正定也。

老子德经下

论德第三十八

上德不德。——上德谓太古无名号之君，德大无上，故言上德也。不德者言其不以德教民，因循自然，养人性命其德不见，故言不德也。

是以有德。——言其德合于天地和气流民得以全也。

下德不失德。——下德谓号谥之君德不及上德故言下德也。不失德者其德可见其功可称也。

是以无德。——以有名号及其身故。

上德无为。——谓法道安静无所改为也。

而无以为。——言无以名号为。

下德为之。——言为教令施政事也。

而有以为。——言以为己取名号也。

上仁为之。——上仁谓行仁之君其仁为上故言上仁也。为之者，为仁恩。

而无以为。——功成事立，无以执为。

上义为之。——为义以断割也。

而有以为。——动作以为己杀人以成威赋下以自奉也。

上礼为之。——谓上礼之君其礼无上故言上礼为之者言为礼制度序威仪。

而莫之应。——言礼华盛实衰饰伪烦多动则离道不可应也。

则攘臂而仍之。——言烦多不可应上下忿争，故攘臂相仍引。

故失道而后德。——言道衰而德化生也。

失德而后仁。——言德衰而仁爱见也。

失仁而后义。——言仁衰而分义明也。

失义而后礼。——言义衰则施礼聘行玉帛。

夫礼者忠信之薄。——言礼废本治末忠信日以衰薄。

而乱之首。——礼者贱质而贵文故正直日以少，邪乱日以生。

前识者道之华。——不知而言知为前识，此人失道之实得道之华。

而愚之始。——言前识之人愚闇之倡始。

是以大丈夫处其厚。——大丈夫谓得道之君也。处其厚者处身于敦朴。

不居其薄。——不处身违道为世烦乱也。

处其实。——处忠信也。

不居其华。——不尚言也。

故去彼取此。——去彼华薄，取此厚实。

法本第三十九

昔之得一者。——昔，往也。一无为道之子也。

天得一以清地得一以宁。——言天得一故能垂象清明，地得一故能安静为动摇。

神得一以灵。——言神得一故能变化无形。

谷得一以盈。——言谷得一故能盈满而不绝也。

万物得一以生。——言万物皆须道以生成也。

侯王得一以天下为正。——言侯王得一故能为天下平正。

其致之。——致，致也，谓下五事也。

天无以清将恐裂。——言天当有阴阳施张昼夜更用不可但欲清明无已时将恐分裂不为天。

地无以宁将恐发。——言地当有高下刚柔气节五行不可但欲安静无已时将恐发泄不为地。

神无以灵将恐歇。——言神当有王相囚死休废不可但欲灵无已时将恐虚歇不为神也。

谷无以将恐竭。——言谷当有盈缩虚实不可但欲盈满无已时将恐枯竭不为谷。

万物无以生将恐灭。——言万物当随时生死不可但欲生无已时将恐灭亡不为物也。

侯王无以贵高将恐蹶。——言侯王当屈己以下人汲汲求贤不可但欲高于人将恐颠蹶失其位也。

故贵以贱为本。——言必欲尊贵当以薄贱为本若禹稷躬稼舜陶河滨周公下白屋也。

高必以下为基。——言必欲尊贵当以下为本基犹筑墙造功因卑成高下不坚

固后必倾危。

是以侯王自谓孤寡不穀。一一孤寡谕孤独不穀谕不能如车毂为众辐所凑。此非以贱为本耶。一一言侯王至尊贵能以孤寡自称此非以贱为本乎。以晓人。

非乎。一一嗟叹之辞。

故致数车无车。一一致就也。言人就车数之为辐为轮为毂为衡为轸无有名为车者故成为车以谕侯王不以尊号自名故能成其贵。

不欲碌碌如玉。落落如石。一一碌碌谕少。落落谕多。玉少故见贵，石多故见贱。言不欲如玉为人所贵，如石为人所贱，当处其中也。

去用第四十

反者道之动。一一反本也本者道所以动。动生万物背之则亡也。

弱者道之用。一一柔弱者道之所常用，故能长久。

天下万物生于有。一一万物皆从天地生天地有形位故言生于有也。

有生于无。一一天地神明蜎飞蠕动皆从道生道无形故言生于无。此言本胜于华，弱胜于强。谦虚胜盈满也。

同异第四十一

上士闻道勤而行之。一一上士闻道自勤若竭力而行之。

中士闻道若存若亡。一一中士闻道治身以长存，治国以太平欣欣然而存之退见财色荣誉或于情欲而复亡之也。

下士闻道大笑之。一一下士贪狼多欲见道柔弱谓之恐惧见道质朴谓之鄙陋故大笑之。

不笑不足以为道。一一不为下士所笑不足以名为道。

故建言有之。一一建，设也。设言以有道当如下句。

明道若昧。一一明道之人若闇昧无所见。

进道若退。一一进取道者若退不及。

夷道若类。一一夷，平也。大道之人不自别殊若多比类也。

上德若谷。一一上德之人若深谷不耻垢辱也。

大白若辱。一一大洁白之人若汗辱不自彰显。

广德若不足。一一德行广大之人若愚顽不足也。

建德若偷。一一建设道德之人若可偷引使空虚也。

质真若渝。一一质朴之人若五色有渝浅不明。

大方无隅。一一大方正之人无委曲廉隅。

大器晚成。一一大器之人若九鼎瑚琏不可卒成也。

大音希声。一一大音犹雷霆待时而动谕常爱气希言也。

大象无形。——大法象之人质朴无形容。

道隐无名。——道潜隐使人无能指名也。

夫唯道善贷且成。——成就也。言道善禀贷人精气且成就之也。

道化第四十二

道生一。——道始所生者。

一生二。——一生阴与阳也。

二生三。——阴阳生和气浊三气分为天地人也。

三生万物。——天地共生万物也。天施地化，人长养之也。

万物负阴而抱阳。——万物无不负阴而向阳回心而就日。

冲气以为和。——万物中皆有元气得以和柔若胸中有藏骨中有髓草木中有空虚与气通，故得久生也。

人之所恶唯孤寡不穀而王公以为称。——孤寡不穀者不祥之名而王公以为称者，处谦卑法虚空和柔。

故物或损之而益。——引之不得推之必还。

或益之而损。——夫增高者崩贪富者致患。

人之所教。——谓众人所以教去弱为强去柔为刚。

我亦教之。——言我教众人使去强为弱，去刚为柔。

强梁者不得其死。——强梁谓不信玄妙背叛道德不从经教尚势任力也。不得其死者，为天所绝兵刃所伐王法所杀不得以寿命死也。

吾将以为教父。——父始也。老子以强梁之人为教戒之始也。

遍用第四十三

天下之至柔，驰骋天下之至坚。——至柔者水，至坚金石水能贯坚入刚无所不通。

无有入无间。——无有谓道也。道无形质故能出入无间通神群生也。

吾是以知无为之有益。——吾见道无为而万物自化成是以知无为之有益于人也。

不言之教。——法道不言师之以身。

无为之益。——法道无为治身则有益精神治国则有益万民不劳烦也。

天下希及之。——天下人主也。希能有及道无为之治身治国也。

立戒第四十四

名与身孰亲。——名遂则身退也。

身与货孰多。——财多则害身也。

得与亡孰病。——好得利则病于行也。

甚爱必大费。——甚爱色费精神，甚爱财遇祸患所爱者少所亡者多，故言

大费。

多藏必厚亡。——生多藏于府库死多藏于丘墓生有功劫之忧，死有掘冢探枢之患。

知足不辱。——知足之人绝利去欲不辱于身。

知止不殆。——知可止则财利不累身声色不乱于耳目则身不危殆也。

可以长久。——人能知止足则福祿在己治身者神不劳治国者民不扰故可长久。

洪德第四十五

大成若缺。——谓道德大成之君若缺者灭名藏誉如毁缺不备也。

其用不弊。——其用心如是则无弊尽时。

大盈若冲。——谓道德大盈满之君也如冲者贵不敢骄也。富不敢奢也。

其用不穷。——其用心如是则无穷尽时也。

大直若屈。——大直谓修道法度正直如一也。如屈者，不与俗人争如可屈折。

大巧若拙。——大巧谓多才术也。如拙者，亦不敢见其能。

大辩若讷。——大辩者智无疑如讷者口尤辞。

躁胜寒。——胜，极也。春夏阳气躁疾于上万物盛大极则寒寒则零落死亡也。言人不当刚躁也。

静胜热。——秋冬万物静于黄泉之下极则热热者生之源。

清静为天下正。——能清静则为天下长持正则无终已时也。

俭欲第四十六

天下有道。——谓人主有道也。

却走马以粪。——粪者粪田也。兵甲不用却走马治农田治身者却阳精以粪其身。

天下无道。——谓人主无道也。

戎马生于郊。——战伐不止戎马生于郊境之上，久不还也。

罪莫大于可欲。——好淫色也。

祸莫大于不知足。——富贵不能自禁止也。

咎莫大于欲得。——欲得人物利且贪也。

故知足之足。——守真根也。

常足。——无欲心也。

鉴远第四十七

不出户知天下。——圣人不出户以知天下者以己身知人身以己家知人家所以见天下也。

不窥牖见天道。——天道与人道同大人相通精气相贯人君清静天气自正人君多欲天气烦浊吉凶利害皆由于己。

其出弥远，其知弥少。——谓去其家观人家去其身观人身所观益远所见益少也。

是以圣人不行为知。——圣人不上天不入渊能知天地以心知之。

不见而名。——上好道下好德上好武下好力圣人原小知大，察内知外。

无为而成。——上无所为则下无事家给人足万物自化就也。

忘知第四十八

为学日益。——学谓政教礼乐之学也。日益者情欲文饰日以益多。

为道日损。——道谓自然之道也。日损者，情欲文饰日以消损。

损之又损。——损情欲又损之所以渐去。

以至于无为。——当恬淡（改心旁）如婴儿无所造为。

无为而无不为。——情欲断绝德与道合则无所不施无所不为也。

取天下常以无事。——取，治也。治天下常当以无事不当烦劳也。

及其有事，不足以取天下。——及其好有事则政教烦民不安故不足以治天下也。

任德第四十九

圣人无常心。——圣人重改更，贵因循，若自无心。

以百姓心为心。——百姓心之所便因而从之。

善者吾善之。——百姓为善圣人因而善之。

不善者吾亦善之。——百姓虽有不善者圣人化之使善也。

德善。——百姓德化圣人为善。

信者吾信之。——百姓为信圣人因而信之。

不信者吾亦信之。——百姓为不信圣人化之使信也。

德信。——百姓德化圣人为信。

圣人在天下怵怵。——圣人在天下怵怵常恐怖富贵不敢骄奢。

为天下浑其心。——言圣人为天下百姓浑浊其心若愚闇不通也。

百姓皆注其耳目。——注，用也。百姓皆用其耳目为圣人视听也。

圣人皆孩之。——圣人爱念百姓如孩婴赤子长养之而不责望其报。

贵生第五十

出生入死。——出生谓情欲出无内魂定魄静故生也。入死谓情欲入于胸臆精神劳惑故死。

生之徒十有三，死之徒十有三。——言生死之类各有十三谓九窍四关也。

其生也目不妄视耳不妄听鼻不妄香死（上加日）口不妄言味手不妄持足不妄行

精神不妄施其死也及是也。

人之生动之死地十有三。一一人之求生动作反之十三死也。

夫何故。一一问何故动之死地也。

以其生生之厚。一一所以动之死地者以其求生活之事太厚违道忤天妄行失纪。

盖闻善摄生者。一一摄，养也。

陆行不遇兕虎。一一自然远避害不干也。

入军不避甲兵。一一不好战以杀人。

兕无投其角，虎无所措爪，兵无所容其刃。一一养生之人虎兕无由伤兵刃无从加之也。

夫何故。一一问虎兕兵甲何故不害之。

以其无死地。一一以其不犯十三之死地言神明营护之此物不敢害。

养德第五十一

道生之。一一道生万物。

德畜之。一一德一也。一主布气而畜养。

物形之。一一一为万物设形象也。

势成之。一一一为万物作寒暑之势以成之。

是以万物莫不尊道而贵德。一一道德所为无不尽惊动而尊敬。

道之尊德之贵夫莫之命而常自然。一一道一不命召万物而常自然应之如影响。

故道生之德畜之长之育之成之孰之养之覆之。一一道之于万物非但生之而已乃复长养成熟覆育全于性命人君治国治身亦当如是也。

生而不有。一一道生万物不有所取以为利也。

为而不恃。一一道所施为不恃望其报也。

长而不宰。一一道长养万物不宰割以为利也。

是谓玄德。一一道之所行恩德玄闇不可得见。

归元第五十二

天下有始。一一始有道也。

以为天下母。一一道为天下万物之母。

既知其母复知其子。一一子，一也。既知道已当复知一也。

既知其子复守其母。一一已知一当复守道反无为也。

没身不殆。一一不危殆也。

塞其兑。一一兑，目也。目不妄视也。

闭其门。一一门，口也。使口不妄言。

终身不勤。——人当塞目不妄视闭口不妄言则终身不勤苦。

开其兑。——开目视情欲也。

济其事。——济，益也。益情欲之事。

终身不救。——祸乱成也。

见小曰明。——萌芽未动祸乱未见为小昭然独见为明。

守柔曰强。——守柔弱日以强大也。

用其光。——用其目光于外视时世之利害。

复归其明。——复当反其光明于内无使精神泄也。

无遗身殃。——内视存神不为漏失。

是谓习常。——人能行此是谓习修常道。

益证第五十三

使我介然有知行于大道。——介，大也。老子疾时王不行大道，故设此言，使我介然有知于政事我则行于大道躬无为之化。

唯施是畏。——唯，独也。独畏有所施为失道意，欲赏善恐伪善生，欲信忠恐诈忠起。

大道甚夷。——夷，平易也。

而民好径。——径，邪不平正也。大道世平易而民好从邪径也。

朝甚除。——高台谢（加木旁），宫室修。

田甚芜。——农事废不耕治。

仓甚虚。——五谷伤害国无储也。

服文采（加丝旁）——好饰伪贵内华。

带利剑。——尚刚强武且奢。

厌饮食，财货有余。——多嗜欲无足时。

是谓盗夸。——百姓而君有余者是由劫盗以为服饰持行夸人不知身死家破亲戚并随也。

非道哉。——人君所行如是此非道也。复言也哉者，痛伤之辞。

修观第五十四

善建者不拔。——建立也。善以道立身立国者不可得引而拔也。

善抱者不脱。——善以道抱精神者终不可拔引解脱。

子孙祭祀不辍。——为人子孙能修道如是长生不死世世以久祭祀先祖宗庙无绝时。

修之于身，其乃德真。——修道于身爱气养神益寿延年其德如是乃为真人。

修之于家，其德有余。——修道于家父慈子孝兄友弟顺，夫信妻贞，其德

如是乃有余庆及于来世子孙。

修之于乡，其德乃长。一一修道于乡，尊敬长老爱养幼小教诲愚鄙其德如是乃无不覆及也。

修之于国，其德乃丰。一一修道于国，则君信臣忠仁义自生，祀乐自兴，政平无私，其德如是，乃为丰存也。

修之于天下，其德乃普。一一人主修道于天下，不言而化，不教而治，下之应上，信如影响，其德如是乃为普传。

故以身观身，一一以修道之身观不修道之身，孰亡孰存也。

以家观家，一一以修道之家观不修道之家也。

以乡观乡，一一以修道之乡观不修道之乡也。

以国观国，一一以修道之国观不修道之国也。

以天下观天下。一一以修道之主观不修道之主也。

何以知天下之然哉、以此。一一老子言吾何知天下修道者昌背道者亡，以此五事观而知之也。

玄符第五十五

含德之厚，一一谓含怀道德之厚也。

比于赤子。一一神明保佑含德之人。若父母之于赤子也。

毒虫不螫，一一蜂虿蛇虺不螫。

猛兽不据，攫鸟不搏。一一赤鸟不害于物，物亦不害之，故太平之世，人无贵贱仁心，有刺之物还反其本，有毒之虫，不伤于人。

骨弱筋柔而握固、一一赤子筋骨柔弱而持物坚固以其意心不移也。

未知牝牡之合而俊（改血旁），精之至也。一一赤子未知男女之合会而阴作怒者，由精气多之所致也。

终日号而不唾，和之至也。一一赤子从朝至暮啼号声不变易者，和气多之所致。

知和曰常，一一人能知和气之柔弱有益于入者，则为知道之常也。

知常曰明，一一人能知道之常行则曰以明达于玄妙也。

益生日祥，一一祥，长也。言益生欲自生日以长大。

心使气日强。一一心当专一和柔而气实内故形柔而反使妄有所为，和气去于中，故形体日以刚强也。

物壮则老，一一万物壮极则枯老也。

谓之不道，一一老不得道。

不道早已。一一不得道者，早已死也。

玄德第五十六

知者不言，一一知者贵行，不贵言也。

言者不知。一一驷不及舌，多言多患。

塞其兑，闭其门，一一塞门之者欲绝其源。

挫其锐，一一情欲有所锐为当念道无为以挫止之。

解其忿、一一纷结恨不休，当念道无为以挫止之。

和其光，一一虽有独见之明当和之使闇昧不使曜乱。

同其尘，一一不当自别殊也。

是谓玄同。一一玄，天也。人能行上上事是谓与天同道也。

故不可得而亲，一一不以荣誉为乐独立为哀。

亦不可得而疏、一一志静无故与人无怨。

不可得而利，一一身不欲富贵口不欲五味。

亦不可得而害，一一不与贪争利，不与勇争气。

不可得而贵，一一不为乱世主，不处暗君位。

亦不可得而贱。一一不以乘权故骄不以失志故屈。

故为天下贵。一一其德如此天子不得臣，诸侯不得屈，与世沈浮容身避害故为天下贵也。

淳风第五十七

以正治国，一一以，至也。天使正身之人使至有国也。

以奇用兵，一一奇，诈也。天使诈为之人使用兵也。

以无事取天下。一一以无事无为之人使取天下为之主。

吾何以知其然哉、以此。一一此，今也。老子言我何以知天意然哉，以今日所见知。

天下多忌讳，而民弥贫。一一天下谓人主也。忌讳者防禁也。令烦则奸生，禁多则下诈相殆故贫。

民多利器，国家滋昏。一一利器者权也。民多权则视者眩于目听者惑于耳，上下不亲故国家昏乱。

人多伎巧，奇物滋起、一一人谓人君百里诸侯也。多知伎巧谓刻画宫观雕琢服章奇物滋起下则化上饰金镂玉文绣采色日以滋甚。

法物滋彰，盗贼多有。一一法物，好物也。珍好之物滋生彰着则农事废饥寒并至故盗贼多有也。

故圣人云、一一谓下事也。

我无为而民自化、一一圣人言我修道承天无所改作而民自化成也。

我好静而民自正、一一圣人言我好静不言不教民皆自忠正也。

我无事而民自富、一一我无徭役征召之事民安其业故皆自富。

我无欲而民自朴。——我常无欲去华文征服饰民则随我为多质朴也。

顺化第五十八

其政闷闷，——其政教宽大闷闷昧昧似若不明也。

其民醇醇、——政教宽大故民醇醇富厚相亲睦也。

其政察察，——其政教急疾言决于口听决于耳也。

其民缺缺。——政教急民不聊生，故缺缺日以疏薄。

祸兮福之所倚、——倚，因也。夫祸因福而生，天遭祸而能悔过责己修善行道则祸去而福来。

福兮祸之所伏。——祸伏匿于福中人得福而为骄恣则福去祸来。

孰知其极。——祸福更相生谁能知其穷极时。

其无正、——无，不也。谓人君不正其身，其无国也。

正复为奇，——奇，诈也。人君不正下虽正复化上为诈也。

善复为妖——善人皆复化上为妖祥也。

人之迷，其日固久。——言人君迷惑失正以来其日已固久。

是以圣人方而不割，——圣人行方正者欲以率下不以割截人也。

廉而不害，——圣人廉清欲以化民不以伤害人也。今则不然正己以害人也。

直而不肆，——肆，申也。圣人虽直曲己从人不自申之也。

光而不曜。——圣人虽有独知之明常如闇昧不以曜乱人也。

守道第五十九

治人——谓人君欲治理人民。

事天，——事，用也。当用天道顺四时。

莫若嗇——嗇，贪也。治国者当爱民则不为奢泰，治身者当爱精气不放逸。

夫唯嗇，是谓早服。——早，先也。服，得也。夫独爱民财爱精气则能先得天道也。

早服谓之重积德。——先得天道是谓重积德于己也。

重积德则无不克，——克，胜也。重积德于己则无不胜。

无不克则莫知其极。——无不克胜则莫有知己德之穷极也。

莫知其极，可以有国。——莫知己德有极则可以有社稷为民致福。

有国之母，可以长久。——国身同也。母，道也。人能保身中之道使精气不劳五神不苦则可以长久。

是谓深根固蒂、——人能以气为根以精为蒂，如树根不深则枝蒂不坚则落言当深藏其气固守其精使无漏泄。

长生久视之道。一一深根固蒂者乃长生久视之道。

居位第六十

治大国若烹小鲜。一一鲜，鱼。烹小鱼不去肠不去鳞不敢挠恐其糜也。治国烦则下乱，治身烦则精散。

以道莅天下，其鬼不神。一一以道德居位治天下则鬼不敢见其精神以犯人也。

非其鬼不神，其神不伤人。一一其鬼非无精神也。非不八正不能伤自然之人。

非其神不伤人，圣人亦不伤。一一非鬼神不能伤害人，以圣人在位不伤害人故鬼不敢干之也。

夫两不相伤，一一鬼与圣人俱两不相伤也。

故德交归焉。一一夫两不相伤人得治于阳，鬼得治于阴，人得全其性命，鬼得保其精神，故德交归焉。

谦德第六十一

大国者下流，一一治大国当如居下流不逆细微。

天下之交，一一大国天下士民之所交会。

天下之牝。一一牝者阴类也。柔谦和而不昌也。

牝常以静胜牡，一一女所以胜屈于男，阴胜阳以安尽不先求之也。

以静为下。一一阴道以安静为谦下。

故大国以下小国，则取小国。一一能谦下之则常有之。

小国以下大国，则取大国。一一此言国无大小能执谦畜人则无过失也。

故或下以取，或下而取。一一下者谓大国以下小国，小国以下大国，更以义相取。

大国不过欲兼畜人，一一大国不可失则兼并人国而牧畜之。

小国不过欲入事人。一一使为臣仆。

夫两者各得其所，大者宜为下。一一大国小国各欲得其所大国又宜为谦下。

为道第六十二

道者，万物之奥。一一奥，藏也。道为万物之藏无所不容也。

善人之宝。一一善人以道为身宝不敢违。

不善人之所不保。一一道者不善人之保倚也。遭患逢急犹自知悔卑下。

美言可以市、一一美言者独可于市耳，夫市交易而退，不相宜，善言美语，求者欲疾得，卖者欲疾售也。

尊行可以加人。一一加，别也。人有尊贵之行可以凡异于凡人未足以尊道

。 人之不善，何弃之有。——人虽不善当以道化之盖三皇之前无有弃民德化淳也。

故立天子，置三公，——欲使教化不善之人。

虽有拱璧以先驷马，不如坐进此道。——虽有美璧先驷马而至故不如坐进此道。

古之所以贵此道者何、不日求以得，——古之所以贵此道者不日日远行求索近得之于身。

有罪以勉耶，——有罪谓遭乱世闇君妄行刑诛修道则可以解死免于众耶也

。 故为天下贵。——道德洞远无不覆济全身治国恬然无为故可为天下贵也。

恩始第六十三

为无为，——因成修故无所造作。

事无事，——豫有备除烦省事也。

味无味。——深思远虑，味道意也。

大小多少，——陈其戒令也。欲大反小欲多反少，自然之道也。

报怨以德。——修道行善绝祸于未生也。

图难于其易，——欲图难事当于易时未及成也。

为大于其细。——欲为大事必作于小祸乱从小来也。

天下难事，必作于易。天下大事，必作于细。是以圣人终不为大。——处谦虚也。

故能成其大。——天下共归之也。

夫轻诺必寡信，——不重言也。

多易必多难，——不慎患也。

是以圣人犹难之，——圣人动作举事犹进退艰难之，欲塞其源。

故终无难。——圣人终身无患难之事犹避害深也。

守微第六十四

其安易持，——治身治国安静者易守持也。

其未兆易谋，——情欲祸患未有形兆时易谋正也。

其脆易破，——祸乱未动于朝情欲未见于色如脆弱易破除。

其微易散。——其未彰着微小易散去也。

为之于未有，——欲有所为当于未有萌芽之时塞其端也。

治之于未乱。——治身治国于未乱之时当豫闭其门也。

合抱之木，生于毫末、——从小成大。

九层之台，起于累土。一一从卑至高。

千里之行，始于足下。一一从近至远。

为者败之，一一有为于事废于自然有为于义反于仁有为于色废于精神也。

执者失之。一一执利遇患执道全身坚持不得推让反还。

圣人无为故无败、一一圣人不为华文不为色利不为残贼无坏败。

无执故无失。一一圣人有德以教愚有财以与贫无所执藏故无所失于人也。

民之从事，常于几成而败之。一一从，为也。民人为事常于功德几成而贪位好名奢泰盈满而自败也。

慎终如始，则无败事。一一终当如始不当懈怠。

是以圣人欲不欲，一一圣人欲人所不欲人欲彰显圣人欲伏光人欲文饰圣人欲质朴人欲色圣人欲于德也。

不贵难得之货、一一圣人不眩为服不贱石而贵玉。

学不学，一一圣人学人所不能学人学智诈圣人学自然人学治世圣人学治身守道真也。

复众人之所过。一一众人学问反过本为末过实为华复之者使反本也。

以辅万物之自然一一教人反本实者欲以辅助万物自然之性也。

而不敢为。一一圣人动作因循不敢有所造为恐远本也。

淳德第六十五

古之善为道者，一一治古之善以道治及治国者。

非以明民，一一不以道教民明智巧诈也。

将以愚之。一一将以道德教民使朴质不诈伪。

民之难治，以其智多。一一以其智多故为巧伪。

以智治国，国之贼。一一使智慧之人治国之政事必远道德妄作威福为国之贼。

不以智治国，国之福。一一不使智慧之人知国之政事则民守正直不为邪饰上下相亲君臣同力故为国之福也。

知此两者，亦楷式。一一两者谓智与不智者常能智者为贼不智者能为福是治身治国之法式也。

常知楷式，是谓玄德。一一玄，天也。能知治身及治国之法式，是谓与天同德也。

玄德深矣远矣，一一玄德之人深不可则远不可极也。

与物反矣，一一玄德之人于万物反异万物欲益己玄德施与人也。

乃至大顺。一一玄德与万物反异故能至大顺顺天理也。

后己第六十六

江海所以能为百谷王者，以其善下之，一一江海以卑故众流归之若民归就王。

故能为百谷王。一一以卑下故能为百谷王也。

是以圣人欲上民，一一欲在民上。

必以言下之。一一法江海处谦虚。

欲先民、一一欲在民之前也。

必以身后之。一一先人而后己也。

是以圣人处上而民不重，一一圣人在民上为主不以尊贵虚下故民戴而不为重。

处前而民不害，一一圣人在民前不以光明蔽后民亲之若无有欲害之心也。

是以天下乐推而不厌。一一圣人恩深爱厚视民如赤子，故天下乐推进以为主，无有厌也。

以其不争，一一天下无厌圣人时是由圣人不与人争先后也。

故天下莫能与之争。一一言人皆有为无争与吾争无为。

三宝第六十七

天下皆谓我大，似不肖。一一老子言天下谓我德大我则佯愚似不肖。

夫唯大，故似不肖。一一唯独名德大者为身害故佯愚似若不肖无所分别无所割截不贱人而自贵。

若肖久矣一一肖，善也。谓辨惠也。若大辨惠之人身高自贵行察察之政所从来久矣。

其细。一一言辨惠者唯如小人也非长者。

夫我有三宝，持而宝之。一一老子言我有三宝，抱持而保倚。

一曰慈，一一爱百姓若赤子。

二曰俭，一一赋俭若取之于己也。

三曰不敢为天下先。一一执谦退不为倡始也。

慈故能勇，一一以为仁故能勇于忠孝也。

俭故能广，一一天子身能节俭故民日用广矣。

不敢为天下先，一一不为天下首先。

故能成器长。一一成器长谓得道人也。我能为道人之长也。

今舍慈且勇，一一今世人舍慈仁但为勇武也。

舍俭且广，一一舍其俭约但为奢泰。

舍后且先，一一舍其后己但为人先。

死矣。一一所行如此动入死地。

夫慈，以战则胜，以守则固。一一夫慈仁者百姓亲附并心一意故以战则胜

敌以守卫则坚固。

天将救之，以慈卫之。——天将救助善人必与慈仁之性使能自当助也。

配天第六十八

善为士者不武，——言贵道德不好武力。

善战者不怒，——善以道战者禁邪于胸心絕祸于未萌无所诛怒也。

善胜战者不与，——善以道胜敌者附近以仁来远以德不与敌争而敌自服也。

善用人者为下。——善用人自辅佐者常为人执谦下也。

是谓不争之德，——谓上为之下也。是乃不与人争之道德也。

是谓用人之力，——能身为人下是谓用人臣之力。

是谓配天——能行此者德配天也。

古之极。——是乃古之极要道也。

玄用第六十九

用兵有言，——陈用兵之道老子疾时用兵故托己设其义也。

吾不敢为主——主先也，不敢先举兵。

而为客，——客者和而不倡用兵当承天而后动。

不敢进寸而退尺。——侵人境界利人财宝为进闭门守城为退。

是谓行无行，——彼遂不止为天下贼虽行诛之不行执也。

攘无臂，——虽欲大怒若无臂可攘也。

仍无敌，——虽欲仍引之心若无敌可仍也。

执无兵。——虽欲执持之若无兵刃可持用也。何者伤彼之民罹罪于天遭不道之君愍忍丧之痛也。

祸莫大于轻敌，——夫祸乱之害莫大于欺轻敌家侵取不休轻战贪财。

轻敌几丧吾宝。——几，近也。宝，身也。欺轻敌者近丧身也。

故抗兵相加，——两敌战也。

哀者胜矣。——哀者慈仁士卒不远于死。

知难第七十

吾言甚易知，甚易行。——老子言吾所言省而易知约而易行。

天下莫能知，莫能行。——人恶柔弱好刚强也。

言有宗，事有君。——我所言有宗祖根本事有君臣天下世人不知者非我之无德不与我反。

夫唯无知，是以不我知。——夫惟圣人也是我德之暗不见于外穷极微妙故无知也。

知我者希，则我者贵。——希少也。惟达道者乃能知我故为贵也。

是以圣人被褐怀玉。一一被褐者薄外怀玉者厚内匿宝藏怀不以示人也。

知病第七十一

知不知上，一一知道言不知是乃德之上。

不知知，病。一一不知道言知是乃德之病。

夫唯病病，是以不病。一一夫唯能病苦众人有强知之病是以不自病也。

圣人不病、以其病病，一一圣人无此强知之病者以其常苦众人有此病。

是以不病。一一以比非人也。故不自病。夫圣人怀通达之知托于不知者欲使天下质朴忠正各守纯性，小人不知道意而妄行强知之争以自显著内伤精神减寿消年也。

爱己第七十二

民不畏威，大威至矣。一一威，害也。人不畏小害则大害至，谓死亡也。畏之者当爱精神承天顺地也。

无狭其所居，一一谓心居神当宽柔不当急狭也。

无厌其所生。一一人所以生者为有精神托空虚喜清净饮食不节忽道念色邪僻满腹为伐本厌神。

夫唯不厌，是以不厌。一一夫唯独不厌精神之人洗心濯垢恬泊无欲则精神居之不厌也。

是以圣人自知一一自知己之得失。

不自见，一一不自显见德美于外藏之于内。

自爱一一自爱其身以保精气也。

不自贵。一一不自贵高荣名于世。

故去彼取此。一一去彼自见自贵取此自知自爱。

任为第七十三

勇于敢则杀，一一勇敢有为即杀身也。

勇于不敢则活，一一勇于不敢有为则活其身。

此两者一一谓敢与不敢也。

或利或害。一一活身为利，杀身为害。

天之所恶，一一恶有为也。

孰知其故，一一谁能知天意之故而不犯。

是以圣人犹难之一一言圣人之明德犹难于勇敢况无圣人之德而欲行之乎。

天之道，不争而善胜，一一天不与人争贵贱而人自畏之。

不言而善应，一一天不言万物自动应以时。

不召而自来，一一天不呼召万物皆负阴而向阳。

弹（改丝旁）然而善谋。一一弹（改丝旁），宽也。天道虽宽博，善谋虑

人事修善行恶各蒙其报也。

天网恢恢，疏而不失。——天所网罗恢恢甚大，虽疏远司察人善恶无有所失。

制惑第七十四

民不畏死，——治国者刑罚酷深民不聊生故不畏死也。治身者嗜欲伤神贪财杀身民不知畏之也。

奈何以死惧之。——人君不宽刑罚教民去情欲奈何设刑法以死惧之。

若使民常畏死，——当除己之所残克教民去利欲也。

而为奇者，吾得执而杀之，孰敢。——以道教化而民不从反为奇巧乃应王法执而杀之谁敢有犯者老子伤时王不先道德化之而先刑罚。

常有司杀者——司杀者天居高临下司察人过天网恢恢疏而不失也。

夫代司杀者，是谓代大匠斲。——天道至明司杀者常犹春生夏长秋收冬藏斗杓运移以节度行之人君欲代杀之是犹拙夫代大匠斲木而无功也。

夫代大匠斲者，希有不伤手矣。——人君行刑罚犹拙人代大匠斲则方圆不得其理还自伤代天杀者失纪纲不得其纪纲还受其殃也。

贪损第七十五

民之饥，以其上食税之多，——人民所以饥深者以其君上税食下太多。是以饥。——民皆化上为矣叛道违德故饥。

民之难治，以其上有为，——民之不可治者以其君上多欲好有为也。

是以难治。——是其民化上有为情伪难治。

民之轻死，以其求生之厚，——人民轻犯者者以其求生活之道太厚贪利以自危。

是以轻死。——以求生太厚之故轻入死地也。

夫唯无以生为者，是贤于贵生。——夫唯独无以生为务者爵禄不干于意财利不入于身天子不得臣诸侯不得使则贤于贵生也。

戒强第七十六

人之生也柔弱，——人生含和气抱精神故柔弱也。

其死也坚强。——人死和气竭精神亡欲坚强也。

万物草木之生也柔脆，——和气存也。

其死也枯槁。——和气去也。

故坚强者死之徒，柔弱者生之徒。——以其上二事观知之知坚强者死柔弱者生也。

是以兵强则不胜，——强大之兵轻战乐杀毒流怨结众弱为一强故不胜。

木强则共。——木强大枝弱共生其上也。

强大处下，柔弱处上。一一兴物造功大木处下小物处上大道抑强扶弱自然之效。

天道第七十七

天之道，其犹张弓乎。一一天道暗昧举物类以为谕也。

高者抑之，下者举之，有余者损之，不足者与之。一言张弓和调之如是乃可用夫抑高举下损强益弱天之道也。

天之道，损有余而补不足。一一天道损有余而益谦常以中和为上。

人之道则不然，一人道则与天道反也。

损不足以奉有余。一一世俗之人损贫以奉富夺弱以益强也。

孰能有余以奉天下，唯有道者。一言谁能居有余之位自省爵禄以奉天下不足者乎。唯有道之君能行也。

是以圣人为而不恃，一一圣人为德施不恃其报也。

功成而不处，一一功成事就不处其位。

其不欲见贤。一一不欲使人知己之贤匿功不居荣畏天损有余也。

任信第七十八

天下柔弱莫过于水，一一圆中则圆方中则方拥之则止决之则行。

而攻坚强者莫知能胜。一一水能怀山襄陵磨铁消铜莫能胜水而成功也。

其无以易之。一一夫攻坚强者无以易于水。

弱之胜强，一一水能灭火，阴阳消阳。

柔之胜刚，一一舌柔齿刚齿先舌亡。

天下莫能知，一一知柔弱者长久刚强者折伤也。

莫能行。一一耻谦卑好强梁。

故圣人云、一一谓下事也。

受国之垢，是谓社稷主，一一君能爱国垢浊者若江海不逆小流则能长保其社稷为一国君主也。

受国之不祥，是谓天下王。一一君能引过自与代民受不祥之殃则可以王有天下。

正言若反。一一此乃正直之言世人不知以为反言。

任契第七十九

和大怨，一一杀人者死伤人者刑以相和报。

必有余怨，一一任刑者失人情必有怨及于良人也。

安可以为善。一言一人吁嗟则失天心安可以和怨为善也。

是以圣人执左契，一一古者圣人执左契合符信也。无文书法律刻契合符以为信也。

而不责于人。——但刻契之信不责人以他事也。

有德司契，——有德之君司察契信而已。

无德司彻。——无德之君背其契言司人所失。

天道无亲，常与善人。——天道无有亲疏唯与善人则与司契者也。

独立第八十

小国寡民，——圣人虽治大国犹以为小俭约不奢泰民虽众犹若寡少不敢劳之也。

使有什伯——使民各有部曲什伯贵贱不相犯也。

人之器而不用，——器谓农人之器而不用不征召夺人良时也。

使民重死——君能为民兴利除害各得其所则民重死而贪生也。

而不远徙。——政令不烦则安其业故不远迁徙离其常处。

虽有舟輿，无所乘之、——清静无为不作烦华不好出入游娱也。

虽有甲兵，无所陈之。——无怨恶于天下。

使民复结绳而用之。——去文反质信无欺也。

甘其食，——甘其蔬食不渔食百姓也。

美其服，——美其恶衣不贵五色。

安其居，——安其茅茨不好文饰之屋。

乐其俗，——乐其质朴之俗不转移也。

邻国相望，鸡狗之声相闻，——相去近也。

民至老，不相往来。——其无情欲。

显质第八十一

信言不美，——信者如其实不美者朴且质也。

美言不信。——滋美之言者孳孳华词不信者饰伪多空虚也。

善者不辩，——善者以道修身不采文也。

辩者不善。——辩者谓巧言也。不善者舌致患也。山有玉掘其山水有珠泔其渊辩口多言亡其身。

知者不博，——知者谓知道之士不博者守一元也。

博者不知。——博者多见闻不知者失要真也。

圣人不积，——圣人积德不积财有德以教愚有财以与贫也。

既以为人已愈有，——既以为人施設德化已愈有德。

既以与人已愈多。——既以财贿布施与人而财益多如日月之光无有尽时也。

。

天之道，利而不害。——天生万物爱育之令长大无所伤害也。

圣人之道，为而不争。——圣人法天所施为化成事就不与下争功名故能全

其圣功也。

河上公注终。